

Vatan yagonadir,
Vatan bittadir!

Tong Yulduzi

2013-yil 13-may
N:19 (66924)

Gazeta 1929-yil 1-avgustdan chiqqa boshlagan

O'zbekiston Respublikasi bolalar va o'smirlar gazetasi

ISSN – 2010-6092

SARMISHSOY MO'JIZASI

...Olis manzillarni
ko'zlagan tuyalar
karvoni qo'ng'irog'ining
ovozidan chor-atrofdagi
g'ala-g'ovur bosildi.

Chanqovuz va
sibizg'aning mayin ovozi
tevarakka taralib, qoya-
toshlarda aks sado berdi.

Davomi 2-betda

UCH O'RIN HAM BIZNIKI!

Yaqinda «Xushxabarning qanoti bor» degan iboraning to'g'riligiga yana bir bor amin bo'ldik. R. Glier nomidagi Respublika ixtisoslashtirilgan musiqa maktabining to'rt nafar o'quvchisi Italiyaning Rimini shahrida bo'lib o'tgan «Con mano prendere il sole!» («Qo'lingni quyoshga cho'z!») nomli xalqaro festival g'oliblariga aylanishgani haqidagi quvonchli xabarni eshitib, O'zbekistonimiz dovrug'ini dunyoga taratgan yosh iqtidor egalari bilan yaqindan tanishish maqsadida musiqa maktabi sari otlandik.

Davomi 2-betda

Zuhra NISHONOVA o'lgan surat



UCH O'RIN HAM BIZNIKI!

Kuy-navolar yangrab turgan binoga kirar ekanimiz, cholg'u sozlarini ko'targan o'g'il-qizlar qo'llarini ko'ksilariga qo'yib, «Assalomu alaykum», deya iliq qarshil olishdi. Maqsadimizni bilgach, g'olib o'quvchilar ustozni Anvar aka HOJINAZAROVga ro'para qilishdi. Ustozning ko'zlaridagi quvonchni ko'rib, to'iqinlanib ketdik. Quvonmay bo'ladimi axir, shogirdlaridan bir emas, uch nafari Yevropadan g'olib bo'lib qaytdi. Fursatdan foydalanib, 1-o'rin sohibi bo'lgan Abdurahim SAIDOVni suhbatga chorladik.

– Men 11 yoshimdan afg'on rubobi, fortepiano chalaman. Kechagina Italiya safaridan olamjahon taassurotlar bilan qaytdik. 12 davlatdan kelgan 85 nafar ishtirokchi orasida musiqa cholg'ulari yo'nalishi bo'yicha bitta 1-o'rin O'zbekistonga berildi. Ijro paytida bizlarga ustozimiz Surayyo TILLAXO'JAYEVA jo'rnavozlik qildilar. G'oliblar e'lon qilingan paytdagi holatimni so'z bilan ifodalay olmayman...

2-o'rin sohibi Nurbek QUDRATULLAYEV mazkur musiqa maktabining 7-«B» sinfida tahsil olar ekan. O'z taassurotlari bilan o'rtoqlashib, quyidagilarni gapirib berdi:

– Shu yil fevral oyida Rossiyaning Sankt-Peterburg shahrida bo'lib o'tgan ko'rik-tanlovda 3-o'rinni egallagan edim, Italiyada esa 2-o'ringa munosib ko'rishdi. Italian xalqi bizni iliq kutib oldi. Ko'plab do'stlar orttirdim. Bunda mening ingliz tilini puxta bilishim qo'l keldi.

3-o'rin sohiblari bo'lgan Islombek NURIDDINOV ushbu maskanning 6-«B» sinfida, vokalist Ixtiyor VOHIDOV esa 9-«V» sinfida tahsil olishar ekan. Hay'at a'zolari ularning betakror ijrolarini yuqori baholab, kelgusi yili Ispaniyada o'tkaziladigan musiqa festivaliga yo'llanma taqdim etishdi. Ota-onalari, ustozlari, do'stlari, qo'yingchi, xalqimiz ishonchini oqlagan iqtidorli yoshlarimiz bundanda ko'payaversin.

O'z muxbirimiz

YOSH IJODKORLAR TANLOVI

Buxoro viloyat «Barkamol avlod» bolalar markazida Xalq ta'limi vazirligi va «Barkamol avlod» respublika bolalar badiiy ijodiyot markazi tomonidan «Barkamol avlod» bolalar markazlari to'garak a'zolari o'rtasida o'tkaziladigan «Yosh ijodkor» tanlovining viloyat bosqichi yakunlandi.

Mazkur tanlov bolalar va o'smirlarning Vatanga, tabiatga, san'atga bo'lgan mehrini yanada oshirish, noyob qobiliyat egalarini izlash, bo'sh vaqtni mazmunli o'tkazishni ta'minlash, iqtidorini munosib baholash, aniq bir kasbga yo'naltirish, ma'naviyatini boyitish, arxitektura, san'at va dizayn sohasidagi bilimlarini mustahkamlash, iqtidorli o'quvchilarning xalqaro miqyosdagi festival va tanlovlarda ishtirok etishiga imkon yaratish maqsadida o'tkazildi.

Viloyatdagi 13 ta shahar va tumanlardan ishtirok etgan 65 nafar to'garak a'zolari besh yo'nalish bo'yicha o'z iqtidorlarini namoyish etdilar. Natijalarga ko'ra «Liboslar dizayni» yo'nalishi bo'yicha Shofirkon tuman «Barkamol avlod» bolalar markazi to'garak a'zosi Mohichehra Rasulova, «Landschaft dizayni» yo'nalishi bo'yicha Buxoro viloyat «Barkamol avlod» bolalar markazi to'garak a'zosi Zarnigor Boqiyeva, «Foto dizayn» yo'nalishi bo'yicha Buxoro tuman «Barkamol avlod» bolalar markazi to'garak a'zosi Ixtiyor Xudoyorov, «Yosh arxitektori» yo'nalishi bo'yicha Qorovulbozor tuman «Barkamol avlod» bolalar markazi to'garak a'zosi Madina Hoshimova, «Yosh musavvir» yo'nalishi bo'yicha Shofirkon tuman «Barkamol avlod» bolalar markazi to'garak a'zosi Maftuna Isroilova faxrli 1-o'rinni egallab, Respublika bosqichiga yo'llanma olishdi. G'olib va sovrindorlarga viloyat Xalq ta'limi boshqarmasi va viloyat «Barkamol avlod» bolalar markazining «Faxriy orliq»lari va esdalik sovg'alari topshirildi.

Guljahon KOZIMOVA, viloyat «Barkamol avlod» bolalar markazi direktori o'rinbosari



SARMISHSOY MO'JIZASI

Hunarmandlar, kosib-u kandakorlarining og'ir yuklarini o'rkachlariga ortmoqlagan tuyalar horg'in qadam tashlab, Sarmishsoy darasiga kirib keldi...

Bolajonlar, gap nima haqida ekanligini darhol fahmlagandirsiz? Topdingiz, gap yaqinda Navoiy viloyatidagi Sarmishsoy darasida bo'lib o'tgan «Asrlar sadosi» an'anaviy san'at festivali haqida boryapti.

Ayniqsa, san'atsevar tengdoshlarining quvnoq raqslari, milliy o'yinlarimiz namoyishi barchada katta taassurot qoldirdi.

Amaliy san'at ko'rgazmasi rastalarini to'ldirib turgan qo'li gul hunarmandlarimiz yasagan buyumlar chet ellik sayyohlarda katta qiziqish uyg'otdi. Anjumanga tashrif buyurgan



«O'zbekiston madaniyati va san'ati forumi» jamg'armasi hamda YUNESKONing O'zbekistondagi vakolatxonasi hamkorligida o'tkazilgan ushbu festivalda yurtimizning turli viloyatlaridan kelgan usta-yu hunarmandlar, milliy folklor dastalari o'zlarining bor mahorat-u san'atlarini namoyish etib, yig'ilganlar olqishiga sazovor bo'lishdi.

mehmonlar, olimlar, tadqiqotchilar azaliy an'analarimiz, milliy urf-odatlarimizni tarannum etuvchi kuy-qo'shiqlardan bahramand bo'lishdi.

«Asrlar sadosi»ning dovrug'i o'zligimiz, milliy an'analarimiz, qo'yingchi, yurtimiz dovrug'i bilan uyg'unlashib, dunyoga taraldi.

LAYLO tayyorladi

Toshkent viloyati, Yangiyo'l tumanidagi 66-umumta'lim maktabida «Orasta qizlar» to'garagi faoliyati juda yaxshi yo'lga qo'yilgan.

Qizlar o'rtasida turli mavzularda tadbirlar o'tkazib turiladi. Jumladan, 5-9-sinf qizlari o'rtasida «Xalq hunarmandchiligi – milliy merosimiz» mavzusida katta ko'rgazma tashkil etildi. Unda yuqori sinf qizlari o'z qo'llari bilan yasagan buyumlari, to'qigan kiyimlari, tikkan liboslarini namoyish etishdi. Maktab hovlisi ko'rgazmalar muzeyiga aylangandek edi, go'yo. Mehnat ta'limi fani o'qituvchisi Mahfuza Abduraimova tashkillashtirgan mazkur ko'rgazmaga maktab faollar zalida 8-sinf qizlari o'rtasida o'tgan «Kasbim – faxrim» nomli tadbir ulanib ketdi. Tadbir ishtirokchilari o'zlarini turli xil kasb egalari timsolida tanishtirib, bilimlarini namoyish etdilar. Ushbu tadbirni o'tkazishdan maqsad, o'quvchi-qizlarni mustaqil hayotga tayyorlash, milliy xalq hunarmandchiligi ma'naviy merosimiz ekanligini ular ongiga singdirib borishdan iborat edi. Qiz bolaning kasbi uning baxti ekanligini hayotiy misollar orqali tushuntirish, milliy matolarmizdan tikilgan zamonaviy ko'rinishdagi liboslarini tengdoshlariga namoyish etishdan iborat edi. Tadbir so'ngida maktab rahbari hamda mehmonlar ko'zlangan maqsadga ma'lum ma'noda erishilganini alohida ta'kidladilar.



QIZLAR GULSHANI



Muzaffar AHMEDOV

Zulfiya mukofoti sohibalari

Zulfiya nomidagi Davlat mukofotining bu yilgi sohibalari orasida Saidabonu ham bor.

Oltinko'l tumanidagi 1-umumta'lim maktabini muvaffaqiyatli tamomlab, hozirda Oltinko'l agroiqtisodiyot kollejining 2-bosqichida tahsil olayotgan bu tengdoshimiz bolaligidan

SAIDABONUNING YUTUG'I

adabiyotga alohida mehr qo'ygani bois ko'p kitob o'qiydi, ulardan ilhom olib, she'rilar yozadi. Xorijiy tillarga qiziqishi bois nemis va ingliz tillarini puxta o'rganib, hozirda shu tillarda ham ijod qilmoqda. Kitobxonlik Saidabonuga ko'plab yutuqlar keltirdi. 2010-yilda «Eng faol kitobxon» tanlovida respublika g'olibligini qo'lga kiritdi. 2011-yilda «Majnunol» nomli ilk she'riy to'plami nashr etildi. 2012-yil Markaziy Osiyodagi «Friedrich Ebert» fondi vakolatxonasi tomonidan «Mustahkam oila yili»ga bag'ishlanib o'tkazilgan seminar vakolatxona rahbari Per Teshendorf bilan nemis tilida erkin suhbat olib bordi. Per Teshendorf Saidabonudagi chet tillarini o'rganishga bo'lgan qiziqishni ko'rib: «Men bunday iqtidorli qizaloqning kelajagi porloq bo'lishiga ishonaman», deya fikr bildirdi hamda Fondning tashakkurnomasi bilan taqdirladi. Bundan ruhlangan Saidabonuning chet tillarini

o'rganishga bo'lgan ishtiyoqi yanada jo'sh urdi va 2013-yil ingliz tilida o'quvchilarni darsdan tashqari mashg'ulotlarda foydalanishlari uchun «Happy English» nomli o'quv qo'llanmasi hamda akademik litsey, kasb-



hunar kolleji o'quvchilari, universitet talabalari uchun mo'ljallangan nemis tilidagi «Matnlar to'plami» chop etildi. Tirishqoqligi va bilimdonligi bilan ustozlari hamda tengdoshlari e'tiboriga tushgan Saidabonu sportning voleybol turiga, to'qish, munchoqlardan buyumlar yasashga ham qiziqadi. Shuningdek, O'zbekiston Yozuvchilar uyushmasi Andijon viloyati bo'limi qoshidagi «Bobur izdoshlari» to'garagiga qatnab, yosh ijodkorlar bilan fikr almashadi, ustozlari ko'magida she'riyat, adabiyot sir-asrorlarini o'rganadi.

Kelgusida tarjimon bo'lishni, yurt madhini ijodi orqali xorijiy tillarda ham tarannum etishni o'z oldiga maqsad qilgan Saidabonu Abdusalomovaga bundan-da baland parvozlar tilaymiz.

Yulduzoy O'RMONOVA

Bahor bayramlarga boy fasl, desam adashmayman. Shu kunlarda yana bir katta shodiyonaning guvohi bo'ldik.

SHAHRIMIZDA YANA BAYRAM

Bu galgi «Asrlar sadosi» festivalining viloyatimizdagi Sarmishsoy darasida bo'lib o'tishi qalbimizda faxr tuyg'usini uyg'otdi. Festival mehmonlarining yurtimizdan olgan taassurotlarini, festival haqidagi iliq fikrlarini eshitib, qadrdon go'shamizga bo'lgan mehrimiz yanada ortdi.

Madina UBAYDOVA,
Navoiy viloyati, Uchquduq shahridagi 7-umumta'lim maktabining 7-«A» sinf o'quvchisi

ANHOR

– Suvlari zilol anhor,
Qirg'og'ingdan toshasan.
Sho'x, quvnoq qo'shiq kuylab,
Bilmam, qayga shoshasan?!

– Do'stim, mendan ranjima,
Yumushlarim xo'p bisyor.
O't-o'lan, dov-daraxtlar,
Yo'llaringa intizor.

«Meni sof saqlang!» degan,
Tinglang arz-u nolamni.
Shunda bor mehrim berib,
Yashnataman olamni!

Go'zal RO'ZIQULOVA,
Samarqand shahridagi 1-maktabning 6-«V» sinf o'quvchisi



KUCH – BIRLIKDA!

Biz 5-«B» sinf o'quvchilari yaxshi o'qish uchun astoydil harakat qilyapmiz. Sinf rahbarimiz Maftunaxon Egamberdiyeva boshchiligidagi ko'pgina yutuqlarga erishdik. Masalan, yaqinda matematika fanidan o'tkazilgan bellashuvda yaxshi natija ko'rsatdik. Boshqa fan oylıklarida ham faol ishtirok etib, «Faxriy yorliq» va esdalik sovg'alarini ham qo'lga kiritdik. Yaqinda bo'lib o'tgan «Gullar bayrami»da esa tayyorlagan ko'rgazmalarimiz bilan qatnashib, 1-o'ringa sazovor bo'ldik. Bunday yutuqlarimiz evaziga ustozimiz Maftuna opa bizni Namangan shahridagi «O'lkashunoslik» muzeyiga olib bordilar. U yerda yurtimiz, shahrimiz, tumanimiz tarixiga oid ko'pgina ma'lumotlarga ega bo'ldik. «Kuch – birlikda!» deb bejizga aytilmagan. Shunday ahil jamoani shakllantirgan sinf rahbarimizga, bilim berayotgan barcha ustozlarimizga samimiy minnatdorchiligimizni bildiramiz.

Iroda O'RINBOYEVA,
Namangan viloyati,
Kosonsoy tumanidagi 32-umumta'lim maktabi o'quvchisi



YOZUVCHINING YANGI TUHFASI

Maktabimizda kitobsevar o'quvchilar juda ko'p. Shuning uchun ham yaqinda kutubxonachimiz Surayo opa Karimova tashabbusi bilan o'tkazilgan O'zbekiston xalq yozuvchisi Anvar Obidjonning yangi nashrdan chiqqan «O'q o'tmas bolakay yoxud oltin yurak» nomli asari taqdimoti haqiqiy bayramga aylanib ketdi. Bu asarni maktabimizning deyarli barcha o'quvchilari qiziqib o'qib chiqishdi. Tadbir avvalida o'quvchilar sevimli adibimizning hayoti va ijodiy faoliyati haqida to'liq ma'lumot berdilar. So'ng, ushbu kitobdan joy olgan hikoyalar asosida sahna ko'rinishlari



namoyish etib, tomoshabinlar olqishiga sazovor bo'ldilar. Maktab o'quvchilari ijrosidagi betakror raqs, dilrabo kuy va qo'shiqlar kechaga o'zgacha shukuh bag'ishladi. Sevimli yozuvchi va shoirimizdan yana yangi asarlar kutib qolamiz.

Sarvinoz MANSUROVA,
Farg'ona viloyati, O'zbekiston tumani,
Yaypan shahridagi 10-maktabning 8-sinf o'quvchisi

O'ZIMIZNING MEVALAR ZO'R!

Bir kuni sinfga kirsam, sinfdoshlarim Maratning atrofini o'rab olib, gaplarini zavq bilan eshitishyafti.

– Kecha mehmonga borgandik. Dasturxonaga chet eldan keltirilgan sarxil mevalardan qo'yishibdi, – deya maqtanardi u. Unga boshqa bolalar ham qo'shilishdi. Biri xorijning bu mevavi zo'r desa, boshqasi mana bunisi zo'r, deya tortisha ketishdi.

Shunda o'ylanib qoldim: nahotki odamlar chet davlatdan keltirilgan mevalarga shunchalik o'ch bo'lishsa? Yurtimizda yetishtirilgan mevalar-chi? Axir chet eldan kelgan sayyohlar shirindan-shakar

mevalarimizni, taomlarimizni tillaridan bol tomib maqtashadi-ku. Serquyosh o'lkamizda yetishtirilayotgan sarxil mevalarning qoqilari, konservalangan poliz ekinlarining ko'plab chet davlatlariga eksport qilinishi bugun hech kimga sir emas. Bu fikrlarim bilan chet ellarda yetishtirilgan mevalarni kamsitmoqchi emasman. Ammo, menimcha, o'zimizning mevalarga teng keladigani yo'q!

Avazbek SHERMATOV,
poytaxtimizdagi 114-maktabning 8-«D» sinf o'quvchisi





Atoqli shoirimiz Safar Barnoyev hayot bo'lganida, bu yil yetmish besh bahorni qarshi olgan bo'lardi. XX asr bolalar adabiyotida o'z o'rni, o'z ovozi bo'lgan Safar Barnoyev qator yillar mobaynida bolalar nashrlarida xizmat qildi.

BU OLAMDA YORQIN IZI BOR

Yosh avlodning beg'ubor dunyosi, murg'ak qalblaridan joy olish baxti har kimga ham nasib etavermaydi.

Bolalar shoiri yoki yozuvchisi bo'lish ijodkordan juda katta mehnat, mahorat talab etishini hammamiz ham bilavermaymiz. Zero, bu ijodkorlarning qalbi ham ularnikidek pok, beg'ubor bo'lishi lozim. Yozganlari ona allasi kabi o'quvchi qalbini rom etmasa, bola rohatlanmaydi.

Bu fazilatlarining barini o'zida jamlagan Safar Barnoyev «Dadamning qo'llari», «Sog'inch», «Soldat qaytgan kun», «Kichkina Xo'ja Nasriddin», «Tog'lardaman», «Birinchi tabassum», «Yoshlik sururi», «Yulduzxon va Bahromjon», «Sayroqi bedanalar», «Dadam haqida qo'shiq», «Oq laylaklar», «Mukofot» kabi kitoblari bilan o'quvchilar qalbidan mustahkam joy olgan. Ayni kunlarda ustozni xotirlab, u kishining bolalarbop o'ynoqi she'rilaridan hukmingizga havola etgimiz keldi.

AXTAMQULI



Ko'p qavatli uyda yashar,
Olim, Halim, Nor, Bashar.
Ularning qilgan ishin,
Ibrat qilsak yarashar.

Birga borar maktabiga,
Birga qaytar maktabdan.
Hamma fanlar talabiga,
Javob berar daf'atan.

Neki bo'lsa ekdi ular
Oz, ko'p emas, ellikta.
Qizib ketdi birdan kunlar,
Qarang-chi, endilikda.

Bahor edi. To'rttalasi
Bir qarorga kelishdi.
Ko'plar havas qilishdi,
Ba'zilar-chi, kulishdi.

To'rt og'ayni bog' yaratdi,
Yashnab ketdi bo'shliq yer.
Kimki o'tsa uy ortidan,
«Bog'bon»larga rahmat der.

Ko'p qavatli uy ortida,
Yotar edi bo'shliq yer.
Qat'iy qaror qilishdi-da:
«To'rt azamat keldik», der.

Hu, o'shanda kulganlar-chi,
Tilini tishlab qoldi.
«Barkamollik bog'ini» deya,
Jajji bog'cha nom oldi.

Bo'shliq yerni darsdan keyin,
Chopishdi, sug'orishdi.
Tuproq bo'ldi unday mayin...
To'g'ri, jinday horishdi.

Bu kun ekkkan nihollarin,
Havas qiling bo'yiga.
Ajjib sovg'a bo'ldi ular,
O'zbekiston to'yiga.

So'ng ellikta tok ekishdi,
Ekishdi ellikta nok.
Ellik chinor o'tqazishdi,
To'rt azamat, to'rt o'rtoq.

To'rt qavatli uyda yashar,
Olim, Halim, Nor, Bashar.

1996-yil

INSON - ULUG'

Nuroniylar otaxon-u onaxonlarni e'zozlash, ularga mehr-oqibat, ehtirom ko'rsatish, o'tganlarni yod etish xalqimizga xos bo'lgan fazilatlaridan biri. Bobolarimizdan meros bu qadriyatlar bugungi kunda ham davom ettirilib, sayqallanib boryapti.

Poytaxtimizning Shayxontohur tumanidagi 169-maktabda 9-may - Xotira va qadrlash kuniga bag'ishlangan tadbir bo'lib o'tdi. Unda o'qituvchilar, o'quvchilar, urush va mehnat faxriylari qatnashdilar.

qo'shiqlar kuylashdi. San'atsevar o'quvchilar tomonidan ijro etilgan «Sho'x bolalar», «Buxorocha», «Xorazmcha», «Tovus» kabi raqslar barchada katta taassurot qoldirdi.

Bunday tadbirlar yosh avlod ongida tinchlikning qadriga yetish, Mustaqillikning buyuk ne'mat ekanligini anglash kabi tuyg'ularni shakllantirishga yordam beradi, - deydi maktabning boshlang'ich sinf o'qituvchisi Sayyora Do'smatova.

Tashkilotchilar Go'zal va Shahnoza



Ushbu tadbirni o'tkazishdan maqsadimiz, o'quvchilarning ongi va qalbiga insoniylik, xotira va qadrlashdek kishini ezgu ishlarga undovchi, yuragida mehr-muhabbat nihollarini undiruvchi tushunchalarni singdirishdir, - deydi maktab direktori Yorqinoy Mamatova.

Tadbir davomida o'quvchilar tinchlik, vatanparvarlik, obodlik haqida o'zbek, ingliz, rus tillarida she'rilar o'qishdi,

Toshmuhammedovalar tadbirning qiziqarli va mazmunli o'tishi uchun astoydil harakat qilganlarini unda ishtirok etgan urush va mehnat faxriylari, ustoz-u o'quvchilar alohida e'tirof etishdi.

Inson - aziz, xotira - muqaddas. Shunday ekan, yosh avlod qalbidan ajdodlarga hurmat, ehtirom tuyg'ularini uyg'otish ta'lim-tarbiyaning eng asosiy vazifasidir.

Vasila PO'LATOVA

BOBOLARNI YOD ETIB...

4-«B» sinf rahbari Muattar Yakubova 9-may - Xotira va qadrlash kuniga bag'ishlab tadbir o'tkazish niyatida ekanligini aytganida, o'quvchilari birdek quvonib ketishdi.

Tadbirda tayyorgarlik ishlarini o'quvchilar o'sha kundanoq boshlab yuborishdi. Vatan, Istiqlol, tinchlik, obodlik, do'stlik mavzularida she'rilar yod olib, qo'shiqlar, sahna ko'rinishlari tayyorlashdi.



Poytaxtimizning Uchtepa tumanidagi 197-maktab kichkintoylari tomonidan tayyorlangan «Ajdodlarni yod etib...» deb nomlangan tadbir barchaga manzur bo'ldi.

Tadbir davomida bilimdon, zukko o'g'il-qizlar shuni yaxshi angladilarki, bugungi tinch va osoyishta hayotimizning qadriga yetish, yurtimizni yanada obod qilishga hissa qo'shish juda muhim ekan.

OLMOS



«Tong yulduzi» mamlakatimiz bolalari va o'smirlaridan eng ko'p she'riy maktublar oladigan nashrlardan biri hisoblanadi.

Chunki u yosh ijodkorlarning sevimli gazetasi, chin do'sti, sirdoshi bo'lib kelmoqda.

Sahifalarida chop etilayotgan bolalar shoirlari va yozuvchilarining hayoti, ijodi, joylarda o'tkazilayotgan adabiy kecha va uchrashuvlar haqidagi qiziqarli materiallar she'r yozishga ishtiyokmand o'quvchilarning bu nashrga bo'lgan qiziqishlarini yanada oshirmoqda.

Kezi kelganda, eng sara she'rlarni tanlab, tahrir qilib, ularni rangli suratlar bilan bezatilgan holda o'quvchilar diqqatiga havola etayotgan gazetaning adabiy xodimlari xizmatini alohida e'tirof etsak arziydi.

Tahririyatga kelgan she'riy maktublar bilan yaqindan tanishib, yurtimizda iqtidorli o'quvchilar ko'pligiga, yosh adabiyot ixlosmandlari pishiq-puxta she'rlar yozish yo'lida tinmay izlanayotganliklariga amin bo'ldik.

Quvonarlisi, ular yurakdagi his-tuyg'ularini samimiy, ravon misralarda bayon etishga harakat qilganlar. Yosh qalamkashlar she'riyat bu xayolga kelgan so'zni, fikrni shunchaki qog'ozga tushirish emasligini tobora teranroq anglab borayotgandeklar...

Samarqand viloyati, Narpay tumani, Navoiy mahallasidan tahririyatga she'rlar yo'llagan 6-sinf o'quvchisi Charos SHOMIRZAYEVANing «Dugonalar» nomli she'ri menga juda manzur bo'ldi. Charosning boshlovchi qalamkash sifatidagi ijodiy yutug'i qalb kechinmalarini sodda, samimiy satrlarda ifodalab, o'quvchilarni o'zaro ahillik, inoqlikka chorlay olganidadir:

*Bir sinfda bor edi,
Ahil ikki dugona.
Birisin ismi Charos,
Biri esa Rudsona.*

*Orzulari bir jahon,
Ko'ngillari naqshida.
Birga yurishar har on,
Dugonalar yaxshi-da.*

*Birga dars tasyorlashar,
Birga o'qishar kitob.
Ularining do'stligidan
Quvonar hatto oftob.*

Qizlarning do'stligidan hatto ko'kdagi oftobning ham quvonganini dildan his eta olgan Charos Shomirzayevadan kelgusida bundan ham qiziqarli, o'qishli she'rlar kutib qolamiz.

Navoiy viloyati, Karmana tumanidagi 22-umumta'lim maktabining 7-sinf o'quvchisi Dildora YARASHEVA o'z mashqlarida bahorning betakror go'zalligini o'ziga xos tarzda tasvirlashga harakat qilgan. Tasvirlari garchi yangi fikr kasb etmagan bo'lsa ham, har holda havaskor qizimizning she'riyatning o'ziga xos qonun-qoidalaridan yaxshigina xabardor ekanini bildiradi:



ILHOM SIZNI TARK ETMASIN

*Uyquchi maysalar ko'zin uqalab,
Zamindan ohista*

ko'tarmoqda bosh.

*Zarrin nurlarini har yonga tarab,
Tog'larning ortidan*

kulmoqda quyosh...

Dildoraning she'ri to'liq qofiyali yozishga intilishi tahsinga loyiq. Singlimiz ko'proq badiiy kitoblar o'qisa, she'r yozishni tinimsiz mashq qilsa, albatta, o'quvchiga manzur bo'ladigan she'rlar yoza olishiga umid qilsak bo'ladi.

Surxondaryo viloyati, Qiziriq tumanidagi 10-maktab o'quvchisi Madina IBRAGIMOVANing ona mavzusidagi she'ri ham samimiy mashqlardan bo'libdi.

To'g'ri, ona haqida qalbni «jizilatadigan», bir o'qishda hammani ko'ngildan joy oladigan she'r yozishning o'zi bo'lmaydi. Shunday bo'lsa-da, Madina o'zida jur'at topib, bu mavzuda yaxshigina, ta'sirchan misralarni yozishga erishibdi:

*Osmondagi oymisiz,
Mehrlarga boymisiz,
Siz dunyoda tengi yo'q,
Mehribonim oymisiz.*

Mana shunday samimiy satrlarga yarasha «yarq» etgan badiiy xulosa yoxud fikr bo'lganda bormi, biz shubhasiz bu mashqni to'laligicha o'quvchilar e'tiboriga havola etgan bo'lardik.

Buxoro shahridagi 17-umumta'lim maktabining 5-sinfida tahsil olayotgan Muhabbat NEKOVA o'z maktubiga

ilova sifatida 2011- va 2012-yillarda chop etilgan ikki she'riy to'plamini va o'qituvchisi N.Qodirovaning dil so'zlarini qo'shib jo'natibdi. To'plamlarni katta qiziqish bilan o'qib, quvondik.

*Atirgul, atirgulim,
Tabiatga bezaksan.
Bog'imda yagonasan,
Ko'rkamdirsan, go'zalsan.*

*Sening hidingga
Men bir umr maftun-da.
Go'zaldirsan, o'stiraman
Endi seni kaftimda!*

Tahririyatga kelgan she'riy mashqlar bilan tanishar ekanimiz, ijodkor ustozlarimiz ham o'z his-tuyg'ularini badiiy vositalar orqali yetkazishga harakat qilganlaridan xursand bo'ldik. To'g'ri, ular biroz tahrirtalab, lekin ohangning quvnoqligi, yangilikka o'ziga xos tarzda intilishning borligi, muhimi, o'quvchi ruhiyatiga yaqinligi bilan e'tiborimizni tortdi. Shunday mashqlardan birini Qashqadaryo viloyati, Chiroqchi tumanidagi 34-umumta'lim maktabidan Eshniyoz BURHONOV yo'llagan:

*Bulbullar chertib torin,
Kuylar kuy-qi'shiq borin,
Tarar xushbo'y iforin,
Gullarning dudoqlari.*

*Butun borliq uyg'ondi,
Yomg'ir suvlariga qondi,
Gul, barglarga o'randi,
Daraxtlar butoqlari...*

Biz bunday iliq fikrlarni Jizzax davlat pedagogika instituti qoshidagi 2-

akademik litseyning 1-bosqich o'quvchisi Go'zaloy MUHIDDINOVA, Farg'ona viloyati, Rishton tumanidagi 33-maktabning 8-sinf o'quvchisi Gulchehraxon ABDUAZIZOVA, Navoiy shahridan Mahfuza PO'LATOVA, Farg'ona viloyati, Beshariq tumanidagi 30-umumta'lim maktabining 9-sinf o'quvchisi Nilufar NU'MONOVA, Surxondaryo viloyati, Uzun tumanidan O'rol CHORIYEV, Surxondaryo viloyati, Sherobod tumanidagi 19-maktab xodimi Xolboy SHERDONOVning ijod namunalariga nisbatan ham aytishimiz mumkin. Namlari yuqorida sanab o'tilgan qalamkashlar mashqni bo'sh-tirmasalar, jiddiy o'qib-izlansalar, kelgusida, albatta, yaxshi she'rlar yoza oladilar, deb o'ylayman.

Andijon viloyati, Asaka tumanidagi 59-maktabning 6-sinf o'quvchisi Sardorbek MO'MINOV, Toshkent viloyati, Parkent tumanidagi 34-maktabning 9-sinf o'quvchisi Rustam MALIKOV, Samarqand viloyati, Payariq tumanidagi 10-maktabning 8-sinf o'quvchisi Fotima SHERBO'TAYEVA, Jizzax viloyati,

Forish tumanidagi 7-maktabning 9-sinf o'quvchisi Zulfiya TIRKASHEVA, Farg'ona viloyati, Qo'qon shahridagi 20-maktabning 6-sinf o'quvchisi A'loxon ABDUBURHONOVA, Farg'ona viloyati, Beshariq tumanidagi 41-maktabning 7-sinf o'quvchisi Ra'no ABDU-MALIKOVA, Buxoro viloyati, G'ijduvon tumanidagi 63-maktabning 9-sinf o'quvchisi Sojida RAVSHANOVA, Toshkent shahri, Chilonzor tumanidan Saodat ZULHAYDAROVA, Buxoro viloyati, Shofirkon tumanidagi 20-maktabning 7-sinf o'quvchisi Munojot ASLONOVA, Nozanin HAMIDOVA, Buxoro viloyati, Buxoro tumani, Galaosiy shahridagi 1-maktabning 5-sinf o'quvchisi Niginabonu DAVRONOVA, Qoraqalpog'iston Respublikasi, Qonliko'l tumanidagi 18-maktabning 8-sinf o'quvchisi Turdigul BOBOJONOVA kabi qalamkash uka va singillarimizga, avvalo, ko'proq badiiy asarlar o'qishni, she'riy mashqlar ustida jiddiy ishlashni, yozganlarini birinchi navbatda adabiyot fani o'qituvchilari nazaridan o'tkazib olishni, ana shundan keyingina tahririyatlarga jo'natishlarini maslahat beramiz. Chunki she'r yozish qonun-qoidalarini puxta o'rganmay turib, durust she'rlar yozish mumkin emas.

She'r yozishga ishtiyokmand o'g'il-qizlarga tilagimiz bitta: u ham bo'lsa, faqat yaxshi she'rlar yozing. Buning uchun ko'proq kitob mutolaa qiling, hayotni, tabiatni seving va kuzating. Vaqtinizni behuda o'tkazmang. Ilhom sizni hech qachon tark etmasin.

Abdurahmon AKBAR,
bolalar shoiri.

S.FARMONOV chizgan rasm

Vatanimiz sarhadlarini qo'riqlash, uni ko'z qorachig'idek asrab-avaylash shu yurtida tug'ilgan har bir o'g'lonning sharaflı burchidir.

«LOCHIN»NING BALAND PARVOZI

Bu kabi muqaddas tuyg'ularni farzandlarimiz qalbıga bolaligidanoq singdirib borish esa har birimizning zimmamizga katta mas'uliyat yuklaydi.

Kuni kecha Jizzax viloyatida o'rta maxsus, kasb-hunar ta'limi muassasalari o'quvchilari o'rtasida o'tkazilgan Respublika «Shunqorlar» harbiy-sport musobaqalari ham ana shu ezgu maqsad yo'lida tashkil etildi.

«Kamolot» yoshlar ijtimoiy harakati Markaziy Kengashi, O'zbekiston Respublikasi Mudofaa, Oliy va o'rta maxsus ta'lim, Madaniyat va sport ishlari, Sog'liqni saqlash vazirliklari, Mudofaaga ko'maklashuvchi «Vatanparvar» tashkiloti hamkorligida kasb-hunar kollejlari o'quvchilari o'rtasida an'anaviy ravishda o'tkazib kelinayotgan mazkur musobaqaning bu galgi bahslari ham qizg'in va muhosasiz tarzda kechdi. Tadbırda musobaqaning viloyat bosqichlarida g'olib chiqqan 14 jamoa kross yugurish, merganlik, saf qo'shig'i, harbiy topografiya kabi shartlar bo'yicha o'zaro bellashishdi. Bo'lg'usi Vatan posbonlarining tezkor harakatlari, barcha shartlarni chaqqonlik bilan bajarayotganliklarini ko'rib, yurtimiz kelajagi ishonchli qo'llarda ekaniga yana bir bor amin bo'ldik.

Musobaqa yakunida barcha shartlar bo'yicha g'olib va sovrindorlar aniqlandi. Unga ko'ra, Samarqand viloyati, Payariq

qishloq xo'jalik mahsulotlarini qayta ishlash va servis



kasb-hunar kollejining «Lochin» jamoasi birinchi o'rin – bosh sovrinni qo'lga kiritdi. Jizzax viloyati, Baxmal iqtisodiyot va Surxondaryo viloyati Olimpiya zaxiralari kasb-hunar kollejlari jamoalari keyingi o'rinlarni bo'lib olishdi.

– O'tkazilayotgan bunday harbiy vatanparvarlik sport musobaqalari o'sib kelayotgan yosh avlodni yurtga sadoqat ruhida tarbiyalashga xizmat qiladi, – deydi «Kamolot» yoshlar ijtimoiy harakati Jizzax viloyati bo'limi raisi o'rinbosari Orifjon Shukurov.

Tadbırda qator nominatsiyalar bo'yicha ham g'oliblar aniqlandi. Barcha g'olib va sovrindorlarga kubok, Diplom va esdalik sovg'alari topshirildi.

Sa'dullo TURSINOV

ULKAN G'ALABALAR POYDEVORI



Samarqand viloyati, Samarqand tumanidagi 2-Bolalar va o'smirlar sport maktabi sport-sevar o'g'il-qizlarning sevimli maskaniga aylangan.

562 nafar o'quvchi sportning futbol, voleybol, basketbol, qo'l to'pi, mini futbol kabi turlarida mahoratini oshirayotgan

mazkur maktabda badiiy gimnastika bo'yicha ham mashg'ulotlar yo'lga qo'yildi. Ayni paytda qirg'qa yaqin tarbiyalanuvchi malakali murabbiy Sabina Ahmedova rahbarligida nafis sport turi bilan muntazam shug'ullanmoqda. Sog'lom turmush tarzi, go'zallik, iroda va matonat garovi bo'lgan badiiy gimnastika maktab yoshlari o'rtasida tobora ommalashmoqda.

SPORTSEVARLAR MAKTABI

Surxondaryo viloyati, Jarqo'rg'on tumanidagi 6-Bolalar va o'smirlar sport maktabida 904 nafar o'g'il-qiz sportning voleybol, basketbol, qo'l to'pi, mini futbol, sport gimnastikasi, kurash, taekvando, boks, dzyudo, badiiy gimnastika turlari bilan muntazam shug'ullanmoqda.

Yosh sportchilarning mahoratini oshirishda 24 murabbiy tomonidan yuqori saviyada o'tkazilayotgan mashg'ulotlar o'z samarasini berayotir.

– Maktabimizda 2012-yilda qurilgan, zamonaviy usulda jihozlangan sport zali sportsevar yoshlar ixtiyorida, – deydi maktab direktori Nizomiddin Umbarqulov. – Bu yerda yaratilgan zamonaviy shart-sharoit, mavjud qulayliklardan o'quvchilarimiz unumli foydalanishmoqda.

Shohruh Rahmatov, Otobek Abdusamatov, Namoz Ibrohimov, Muzaffar Rashidov kabi o'quvchilar mamlakatimizdagi va xalqaro miqyosdagi bellashuvlarda sovrinni o'rinlarni egallab kelishmoqda.

Shoh MUHAMMAD



«GULZOR»DA YANA BAYRAM

Zangiota tumanining «Sabzavot» mahallasi hududidagi nomi o'ziga mos bo'lgan «Gulzor» kichik mahallasiga ko'pchilik havas qiladi.

So'lim va obod ushbu mahallani mo'jazgina gulzorga qiyoslash mumkin. Odamlarining ahilligi, totuvligi, mehr-oqibatini aytmaysizmi?! Bayramlar munosabati bilan tashkillashtiriladigan kecha va tadbirlar juda fayzli o'tadi. Bunday tadbirlarda, ayniqsa, bolajonlarning quvonchi cheksiz bo'ladi.

Yaqında mazkur go'shada mahalla faollari Madina Muqimova, Ahror Qosimxo'jayev tashabbusi bilan «Obod turmush yili»ga bag'ishlangan tadbir o'tkazildi. Mahallaning nuroniy otaxon-u onaxonlari izzatda, yoshlar xizmatida bo'ldi. Turli sohalarda salmoqli yutuqlarni qo'lga kiritgan eng faol mahalla yoshlaridan Aziz Muqimov, Xumora va Feruza Saidabrorovaning nomlari faxr va iftixor bilan tilga olinib, ularga «Faxriy yorliq»lar topshirildi. Iqtidorli yoshlarni bunday tadbirlarda rag'batlantirib borish orqali tengdoshlari qalbida ham havas uyg'otib, ulardek bo'lishga intilish



hissi shakllantirib boriladi.

9–10 yoshli bolalar o'rtasida boks bo'yicha Osiyo ochiq chempionatida g'oliblik shohsupasini egallagan Begzod Boltaboyev davraga chorlanganda, atrofnı gulduros qar-saklar, bolajonlarning olqishlari tutib ketdi. Nuriddin Boqiyevga esa «Gulzor»ning eng mehnatkash bolasi», degan nom berildi.

«Turon» yakkakurash federatsiyasi qoshida ochilgan to'garakda ulug' bobomiz Amir Temur davridagi raqs va mashq usullarini o'rganayotgan o'g'il-qizlarning ko'rgazmali chiqishlari kechaga jo'shqinlik, ko'tarinkilik baxsh etdi. Begzod va Nilufar Ahmadjonovalar uchun shu kuni



mahallada nishonlangan tavallud ayyomlari bunday sanalarining eng unutilmasi bo'lib qolsa, ajabmas.

Bir so'z bilan aytganda, «Gulzor»da bolalar va o'smirlarga ko'rsatilayotgan e'tibor ibrat qilsa arziri. Tadbırda ishtirok etgan «Sabzavot» mahallasi raisasi Erkinoy Ubaydullayeva hamda maslahatchi Mohira Rahimova ham astoydil havas qilishdi. Ular hozirda bizning mahallamizda ham iqtidorli, sportsevar, mehnatsevar bolalar juda ko'p-ku axir, deya turli to'garaklar ochish harakatiga tushganlar. Mahallangand mashhurlar chiqsa faxr-ku, axir!

– Biz yoshlarga ko'rsatilayotgan yuksak e'tibordan behad mamnunmiz. Bunga javoban puxta bilim olib, til o'rganib, kasb-hunar sirlarini egallab, sport bilan do'stlashib, kelajakda bundanday yuqori natijalarga erishishga va'da beramiz! – deyishmoqda «Gulzor»lik o'g'il-qizlar.

Muslimbek YUSUPOV

DIQQAT! DIQQAT!

«ONAJONIM TABIAT»

INSHOLAR VA RASMLAR KO'RIK-TANLOVI YAKUNLANDI

Jonajon diyorimiz tabiati go'zal, betakror, saxiqlikda, bag'rikenglikda betimsol xilqat. Uning musaffoligini asrab-avaylash, kelajak avlodlarga ham sofligicha yetkazishdek ezgu ishlarga hissa qo'shish barchamizning burchimizdir.

Shu ma'noda yurtimiz tabiati, atrof-muhiti, atmosfera, yer va suv resurslarini muhofaza qilish, ekologik holatini yaxshilash bo'yicha amalga oshirilayotgan ishlarda o'quvchilarning ham faolligini oshirish, ekologik ta'lim-tarbiyani shakllantirish, yosh avlodning murg'ak qalbida ona tabiatga mehr-muhabbat tuyg'ularini uyg'otish maqsadida:

O'zbekiston Respublikasi Xalq ta'limi vazirligi, O'zbekiston Respublikasi Badiiy akademiyasi, O'zbekiston Davlat tabiat muzeyi, O'zbekiston ekologik harakati, «Tong yulduzi» Respublika bolalar va o'smirlar gazetasi hamkorligida o'tkazilgan an'anaviy «Onajonim tabiat» insholar va rasmlar ko'rik-tanlovi yakunlandi.

Tanlovga kelgan 120 ta ijodiy ishlar O'zbekiston Respublikasi Badiiy akademiyasi, O'zbekiston ekologik harakati xodimlaridan iborat hakamlar hay'ati tomonidan ko'rib chiqilib, quyidagi o'quvchilar g'olib deb topildi:

INSHOLAR BO'YICHA

Bosh sovrin – Shermuhammad DEHQONOV, Farg'ona viloyati, Marg'ilon shahridagi 1-«Mehribonlik uyi» tarbiyalanuvchisi;

1-o'rin – Sultonbek ZIYAYEV, Qoraqalpog'iston Respublikasi, Qonliko'l tumanidagi 7-maktabning 8-«A» sinf o'quvchisi;

2-o'rin – Dilnavoz NAJIMOVA, Toshkent viloyati, Chirchiq shahridagi 26-maktab o'quvchisi;

3-o'rin – Shahnoza TOSHQULOVA, Sirdaryo viloyati, Guliston shahridagi 1-akademik litsey o'quvchisi.

«Eng yosh ishtirokchi» nominatsiyasi g'olibi – Gulchiroy JABBOROVA, Buxoro viloyati, G'ijduvon tumanidagi 43-maktabning 3-«D» sinf o'quvchisi.

Rag'batlantiruvchi o'rin – Sarvar YO'LIBOYEV, Namangan viloyati, Mingbuloq tumanidagi 29-maktabning 4-sinf o'quvchisi.

RASMLAR BO'YICHA

Bosh sovrin – Fotima JO'RABOYEVA, Toshkent shahar, Uchtepa tumanidagi 109-maktabning 7-sinf o'quvchisi;

1-o'rin – Zarina NURMATOVA, Samarqand viloyati, Qo'shrabot tumanidagi 68-maktabning 6-«V» sinf o'quvchisi;

2-o'rin – Mushtariy MOHIRJONOVA, Namangan viloyati, Yangiqo'rg'on tumanidagi 31-maktabning 7-«V» sinf o'quvchisi;

3-o'rin – Mahliyo QUNISHEVA, Navoiy viloyati, Nurota tumanidagi 27-maktabning 8-sinf o'quvchisi.

«Eng yosh ishtirokchi» nominatsiyasi g'olibi – Asadbek AHMEDOV, Jizzax viloyati, Jizzax tumanidagi 10-maktabning 1-«B» sinf o'quvchisi.

Rag'batlantiruvchi o'rin – Hamidullo ABDULLAYEV, Farg'ona viloyati, Beshariq tumanidagi 27-maktabning 6-sinf o'quvchisi.

G'OLIBLARNI QUTLAYMIZ!

G'oliblarni taqdirlash tadbiri 2013-yil 5-iyun kuni soat 15.00 da O'zbekiston ekologik harakati binosida bo'lib o'tadi.

Manzil: Toshkent shahri, Bunyodkor shoh ko'chasi, 1-«A» uy.
Qo'shimcha ma'lumot uchun telefonlar: 244-63-08, (99890) 948-54-95.

O'qing, qiziq!

BANAN

Banan aslida daraxt emas. Balki sayyoramizdagi tez o'suvchi eng katta butalardan biri. Masalan, Yangi Gvineyada o'suvchi yirik bananning bo'yi 15 metrgacha bo'lib, undan tarqalayotgan hid ko'rshapalaklarni o'ziga jalb etadi. Kunduzi esa gullari hididan qushlar va hasharotlar bahramand bo'lishadi.

KOKOS PALMALAR

Kokos palmasi tropik dengizlar qirg'oqlarida o'sadi. Taxminan 100 yil o'sadigan palmalar juda ko'p meva soladi. Mevalar pishgach, suvga tushadi, to'lqinlar ularni dengizga olib ketadi. Shu tariqa ular boshqa qirg'oqlarga ham tarqalib, o'sha yerlarda ham unib chiqadi.

Gulchehra UBAYDULLAYEVA,
Sergeli tumanidagi 172-maktabning
9-«A» sinf o'quvchisi

TOPISHMOQLAR

Tunukani chertadi,
Kesaklarni kertadi.
Biroz «sho'xlik» qilgach u,
Yerga singib ketadi.

Qishda terlab ishlaydi,
Boshqa mahal qishlaydi.

Yungi – igna,
Burni – tugma,
Ko'zi – munchoq,
Bag'ri – yumshoq.



Fayzulla
ABDULLAYEV

Zoologiya darsida o'qituvchi so'radi:
– Olimjon, ayt-chi, suvda ham, quruqlikda ham birday yashay oladigan jonivorlar qanday ataladi?
– Matroslar, – javob berdi o'quvchi.



Ona o'g'liga dedi:
– Televizor ko'rib o'tirguncha, otangga uy vazifalarini tayyorlashga qarashib yubormaysanmi?

ZUBAYDA tayyorladi

8

13-may 2013

Bosh muharrir
Feruz JALILOVA

Tahrir hay'ati:
Bahodir G'ANIYEV,
Svetlana INOMOVA,
Murtazo SULTONOV,
Zoir ISAJONOV,
Sa'dullo TURSINOV
(Bosh muharrir o'rinbosari),
Feruz ADILOVA
(mas'ul kotib),
Zikrilla TESHABOYEV,
Quroqboym ERGASHEV,
Sobitxon TURG'UNOV

Naybachi muharrir
Sayyora QODIROVA
Rassom
Feruz MATYOQUBOV
Dizayner
Shaxobiddin MAXMADIYEV
Musahhih
Nargiza ABDULLAYEVA

Manzillimiz:
Toshkent shahri,
Navoiy ko'chasi, 30-uy.
Indeks: 100129.
Obuna indeksi: 198.
e-mail:
info@tongyulduzi.uz
www.tongyulduzi.uz

Tel: 244-63-08
Tel./faks:
(99871) 244-38-10

«O'zbekiston» NMIUda chop etildi.
Tahririyatga kelgan barcha qo'lyozmalar tahrir qilinadi, mualliflarga qaytarilmaydi.
Haftaning dushanba kuni chiqadi. Shakli A-3, 2 bosma taboq.
ISSN 2010-6092
Adadi - 85 074
Buyurtma N: J 7111

Muassislar:

O'zbekiston Matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOT» yoshlar ijtimoiy harakati Markaziy Kengashi,
«SOG'LOM AVLOD UCHUN» hukumatga qarashli bo'lmagan xalqaro xayriya jamg'armasi.

Gazeta O'zbekiston Matbuot va axborot agentligida
0208-raqam bilan 2007-yil 2-fevralda ro'yxatdan o'tgan.